

# DOMENIE XXVI «VIE PAL AN»

## Jutoris pe Liturgjie

Domenie, ai 27 di Setembar dal 2020

*Alore Gjesù ur vierzè la ment par lâ a font des Scrituris* (Lc. 24, 45)

**Vite - Bibie - Popul**

pre Antoni Beline e une sô opinion di îr - par fânus rifleti vuê

### **Furtunât il popul che il Signôr al è il so Diu** **Ultimis riflessions di pre Antoni, autôr dal libri**

*Vuê ancje il Friûl si cjate tune situazion di diaspore o dispersion. No dome pal fat migratori, ma parcè che la sô stesse esistence culturâl e etniche e je in pericul e nol cjate ni tal podê civîl ni tal templi un orientament precîs e un jutori clâr.*

*No saressial il câs, come che a àn fat i ebreus dal esili, di fâ une largje e profonde riflession e leture sapienziâl e teologjiche dai grancj moments de sô storie, tant di glorie che di dolôr, par cjatâ une glagn, une continuitât, un criteri di sielte di chei valôrs che a son la fonde dal so jessi un popul particolâr e che no si pò rinunziâ se si vûl cjantâ ancjemò un pôc la glorie di Diu cu la nestre storie te grande famee dai popui?*

*No vino vût ancje nô la nestre preistorie, la nestre profugance, lis nestrîs migrazions biblichis e invasions, i nestrîs patriarcjîs, i nestrîs moments di sflandôr e i nestrîs moments di strache? E no vino vût ancje nô, in ogni ete, i nestrîs profetis che magari, par jessi biblics, ju vin fats fûr o fats tasê par ordin che Diu nus ai mandave?*

*Une riflession di cheste fate e sarès une gracie grande e une garanzie uniche par podê frontâ ancje lis sfidis dal doman. E il vantaç al sarès straordenari. Il nestrî popul al podarès no dome rivâ a atualizâ la grande epopee bibliche ebraiche, ma al podarès rivâ a scrivi une sô Bibie, une sorte di diari dal lunc viaç che lu à quartât de preistorie celtiche a vuê. No par vantâsi, ma par podê frontâ il doman.*

*Vê une Bibie par furlan e je za une biele robe. Vê la Bibie furlane o dai furlans, là che si incuintre il progjet di Diu cul progjet dal nestrî popul, al è un sium tant grant che mi fâs vignî l'ingirli. Ma un ch'al à a pratiche la Bibie al pò fâ dut, fûr che rinunziâ ai siums e a lis sorpresis.*

Grazie, pre Antoni, des tôs riflessions che nus àn fat rifleti,  
des sperancis che nus àn scjaldât il cûr,  
des vuiscjadis par cirî di dânus une cussience di popul e di glesie,  
e soledut de tô fede, spirtualitât bibliche e devozion.

Tu âs reson tu: Furtunât il popul che il Signôr al è il so Diu.  
Il Pari che o vin in cîl ti ricompensi di dutis lis tôs fadiis.

Benedete la tiere che tu fâs. Amen.

\* \* \*

*Tal vanzeli di vuê Gjesù si cjate a Gjerusalem li che il braç di fuarce cui avversaris al devente simpri plui periculôs. La parabule dai “doi fîs: chel dal sì e chel dal no” e include i socestants dai predîs e i ainzians dal popul: lôr a disin - sì - a la religjon ma in pratiche a boicotin la buine gnove dal Ream dai cîi, intant che i publicans e lis sdrondinis a an crodût al mes di Gjesù.*

*In Matieu la parabule e ven metude tune curnîs diferente: e à di dà une rispueste a la comunitât-glesie dal apuestul dividude fra “i gjudeizants dal - sì - che a son pal - no - e i paians dal - no - che a son pal - sì -”.*

*In cheste domenie, la parabule e rive a noaltris colorade dai colôrs di doimil agns di riflessions e di storie e e spiete, atalizantle, la pinelade gnove de nestre riflessione.*

*Tant par començâ, come personis, si podarès tignî presinte la constatazion di S. Pauli: In efîets no rivi a capî nancje jo ce che o fâs: di fat no fas ce che o vuei, ma o fas ce che no vuei (Rm 7, 15).*

*Pe societât che si cjatìn, baste pensâ al incuinament dal aiar e de aghe, a la tiere malade li che in alt i acuardis zurâts pal cambiment a son tancj intant che in pratiche cuasi nuie si môf; o sin fîs dal sì che al è no: une gjernazie triste e traditorie (Mt 12, 39).*

*Pe glesie o vin come spieli i grancj documents dal Concili Vatican II continuamentri citâts e spes tradîts. Fîs dal sì che al è no.*

*Un om al veve doi fîs. La parabule dal Signôr e je semplice, di cuatri riis, ma lis riflessions che indi vegnin, a puedin sedi tantis e penzis ancje par nô.*

### Antifone di jentrade

Dn 3,31.29.30.43.42

**Signôr**, dut ce che tu nus âs mandât tu lu âs fat seont une sentence vere;  
o vin pecjât cuintri di te, no vin ubidît ai tiei comandaments;  
ma cumò dai glorie al to non e tratinus seont la ricjece dal to boncûr.

### Colete

Diu, che tu palesis la tô plui grande fuarce  
cuant che tu perdonis e tu âs dûl,  
fâs risinâ cence polse sore di nô la tô gracie,  
par ch’o corìn viers di ce che tu âs imprometût  
e o spartin cun te l’ereditât dal cîl.  
Pal nestri Signôr Gjesù Crist to Fi, ch’al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE

Ez 18,25-28

*Nol è just il mût di fâ dal gno Signôr! Cheste riflessione dal profete e pò sedi un spieli des discussions fra Gjesù e i siei avversaris; e je valide però ancje orepresint tal furmiâr des peraulis de nestre societât li che veretât, imbroi e bausie si dan une man e si confondin; e soledut, piês ancjemò, te plui part a restin dispeadis de onestât de cussience.*

*La leture nus vise ancje che te veretât-justizie-judizi dal Signôr, par mâl che nus vadi, si pues simpri tornâ a dâ di ca. Ancje te muart la resurezion e je pronte.*

*Al à reson David cuant che tal cjastic al dîs: “Poben, colìn tes mans dal Signôr, parcè che il so boncûr al è grant. Che no mi sucedi di colâ tes mans dai oms!” (2 Sam 24, 14).*

### Dal libri dal profete Ezechiele

Cussì al dîs il Signôr: Vualtris o disês: Nol è just il mût di fâ dal gno Signôr! Scoltâitmi d’Israel. Isal il gno mût di fâ che nol va o no isal forsit il vuestri fûr di plomp? Se il just si slontane de justizie, nol è plui just e si bute malamentri e par chel al mûr, al à di murî pal mâl che al à fat! Se invezit il trist si mende de tristerie che al à vude e al met in vore lis leçs e la justizie, si salvarà. Se, spaventât, si mendarà di dutis lis ribelions che al à fatis, sigûr che al vivarà, nol à di murî.

Peraule di Diu.

## SALM RESPONSORIÂL

dal Salm 24 (25)

*Il salm originâl al è colm di tenarece filiâl viers dal Signôr; culî la liturgjie e à sielzût i versets che plui nus cjacarin di misericordie e di perdon cuasi interpretant la nestre situazion spirituâl. E no à ducj i tuarts, parcè che, fîs dal sì o dal no, se o vin alc di veretât te umiltât,... si cjatìn pecjadôrs.*

### **R. Visiti, Signôr, dal to boncûr.**

*Se cchantât: Il cjan dai salms responsoriâi, p.76.*

Mostrimi, Signôr, lis tôs stradis,  
insegnimi i tiei trois.  
Parcè che tu tu sês il Diu che mi salve  
e dute la mari dal dì jo ti spieti. **R.**

Visiti, Signôr, dal to boncûr de tô misericordie che di simpri e dure.  
I pecjâts che o ài fâts di zovin e lis mês colpîs dismenteilis,  
visiti di me seont il to boncûr,  
Signôr, te tô misericordie. **R.**

Bon e just al è il Signôr;  
par chel al indreçarà i pecjadôrs pe sô strade.  
Al fasarà cjaminâ i puars te sô justizie  
e ur insegnarà la sô strade. **R.**

## SECONDE LETURE

Fil 2, 1-11

*I cristians de citât di Filip a formavin une bieie comunitât e S. Pauli si consolave di lôr. Ma ancje alî, pie e no pie bale e no bale, e jere jentrade la code dal piês demoni, chel che al separe, al divît e al distrûç l'amôr fra di nô. Pauli te sô esortazion incorade al da dome une raccomandazion: Cirî di vê dentri di vualtris il stes sintî che al è in Crist Gjesù.*

*Di seguit, come corolari, une cjante liturgjiche su Crist, perle preziosissime che l'Apuestul al à cjatât tune comunitât e metude dentri te letare. I sin tant e tant ricognossints.*

### **De letare di San Pauli apuestul ai Filipês**

Fradis, se duncje e je une consolazion in Crist, se al è un confuart che al vegni dal amôr, se e je une cualchi colegance di spirt, se al è un cûr plen di compassion, jemplaitmi di gjonde cul lâ dacuardi, cul praticâ il stes amôr, cul stes volê e cul stes sintî. No stait a fâ nuie par ambizion ni par supierbie, ma cun dute umiltât stimait chei altris plui bogns di vualtris; no smicjant ognidun a fâ dome i siei interès ma ancje chei di chei altris.

Cirî di vê dentri di vualtris il stes sintî che al è in Crist Gjesù,

lui che, jessint Diu par nature,  
nol à ritignût un ben di no molâlu  
il so jessi compagn di Diu,  
ma si è ridusût a nuie  
cjapant sù la nature di sotan  
e diventant compagn dai oms;  
comparît in forme di om,  
si è sbassât in mò di plui  
fasintsi ubidient fint a la muart

e a la muart di crôs.  
Par chel Diu lu à puartât in alt  
e i à dât chel non  
che al è plui alt di ogni altri non,  
par che tal non di Gjesù  
*si plei ogni zenoli*  
des creaturis dai cîi, de tiere e di sot tiere  
e *ogni lenghe e professi*  
che Gjesù Crist al è il Signôr,  
a glorie di Diu Pari.

Peraule di Diu.

### CJANT AL VANZELI

cf. Zn 10, 27

#### **R. Aleluia, aleluia.**

Lis mê s pioris a scoltin la mê vôs,  
al dîs il Signôr,  
jo lis cognòs e lôr mi vegnin daûr.

#### **R. Aleluia.**

### VANZELI

Mt 21, 28-32

I publicans e lis sdrondinis us passin denant tal ream dai cîi.

*Jutoris pe nestre riflessione:*

+ Il Fi di Diu, Gjesù Crist nol è stât “sì” e “no”, ma in lui al è stât dome il “sì” In lui dutis lis promessis di Diu a son diventadis “sì”. Par chest, midiant di lui al va sù a Diu ancje il nestri “Amen”, pe sô glorie (cf. 2 Cor 2, 19-20).

+ *Cheste ubidience, chest “sì” i à costât a Crist: suplichis cun grancj berlis e lacrimis ... Al à imparât patint a ubidî ... e al è stât scoltât pe sô ubidience (cf. Eb 5, 7-10).*

*E S. Jacum te sô letare nus vise: Viodeit di sedi di chei che a metin in pratiche la peraule e no dome che le scoltin imbroiantsi dibessôî (Jac 1, 22).*

#### **Dal vanzeli seont Matieu**

In chês volte, Gjesù al disè ai sorestants dai predis e ai ainzians dal popul: “Ce us parial? Un om al veve doi fîs. Lant a fevelâ cul prin, i disè: Fi, vuê va a vore tal vignâl. Chel i rispuindè: O voi, paron; ma nol lè gran. Al lè a fevelâ cul secont e i disè la stesse robe. Chel i rispuindè: No voi. Ma dopo, pintût, al lè. Cuâl dai doi àial fate la volontât dal pari?”. I rispuindin: “L’ultin”. E Gjesù a lôr: “Us al dîs in veretât: i publicans e lis sdrondinis us passin denant tal ream dai cîi. Di fat al è vignût Zuan su la strade de justizie e vualtris no i vês crodût; invezit i publicans e lis sdrondinis i àn crodût. Vualtris, seben che o vês viodût, no si sês pleâts nancje dopo a crodi in lui.

Peraule dal Signôr.

#### **Su lis ufiertis**

Diu di misericordie,  
danus la gracie che cheste nestre ufierte ti plasi  
e nus spalanchi la risultive di ogni benedizion.  
Par Crist nestri Signôr.

#### **Antifone a la comunion**

Sal cf. 118/119, 49-50

Tu Impensiti, Signôr, de peraule che tu i âs dade al to famei,

tu mi âs dât parie ancje la sperance;  
chest mi à dât confuart te mê miserie.

### Daspò de comunion

Il misteri dal cîl che nus ristori, Signôr,  
te anime e tal cuarp, par spartî inte glorie l'ereditât  
di chel ch'ò partecipin a la sô passion e o proclamìn la sô muart.  
Lui ch'al vîf e al regne tai secui dai secui.

\* \* \*

Sante messe e Eucaristie, rîts, preieris, cjants: Hosanna pp. 34 - 119.

\* \* \*

### **Fi, vuê va a vore tal vignâl. Chel i rispuidè: O voi, paron; ma nol lè gran.**

*Tutto quello che posso assicurarvi, in vera umiltà, è che nessuno che non abbia un cospicuo senso di umiltà potrà mai trovare la Verità. Se volete nuotare nel fondo dell'oceano della Verità, dovete ridurvi a zero.*

*Il cercatore della Verità dovrebbe essere più umile della polvere. Il mondo schiaccia la polvere sotto i suoi piedi, ma il cercatore della verità dovrebbe essere così umile nella propria persona che anche la polvere potrebbe schiacciarlo. Solo allora, e non prima, avremo uno sprazzo della Verità.*

*Non arriveremo mai alla verità per mezzo di ragionamenti ed argomentazioni; la troveremo solo cercandola nel profondo di noi stessi.*

*Una parola vera è più che sufficiente; mille parole false sono senza valore.*

*Verità e Amore sono le sole parole che contino. Dove sono presenti, tutto alla fine si aggiusta. Questa è una legge che non contempla eccezioni.*

*La verità è come un albero, che da sempre più frutti man mano che lo si nutre. Più si approfondisce la ricerca nella miniera della verità, più ricca sarà la scoperta delle gemme ivi racchiuse nella forma di prospettive sempre più varie per servire il prossimo.*

Mahatma Gandhi

\* \* \*

- \* *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- \* *Il cjant dai salms responsoriâi, Ed. Glesie Furlane, 2012.*
- \* *Il libri des riflessions di pre Antoni al è: pre Antoni Beline, Furtunât il popul che al è il Signôr il so Diu - par une leture sapienziâl de Bibie, Edizion "La Patrie dal Friûl", 1991.*

- \* *50 corâi de cristianitât todescje voltâts par furlan, ed. Glesie Furlane, 2016.*
- \* *Par domandâ chescj libris scrivêt a [info@glesiefurlane.org](mailto:info@glesiefurlane.org)*